

Jorge Pesquera di AHATA:

E reto grandi ta pa laga plannan di conferencia CZM bira realidad

Botter, plastic y sushi di construccion unda cu ta, mester bira algo di pasado

ORANJESTAD—Ta parse cu tin otro cos ta crece bou matanan na Aruba. Esaki ta e conclusion di CEO di AHATA Jorge Pesquera despues di ta pasa algun ora pa dia ta cana. Pesquera a referi na e cantidad di botter y plastic cu ta acumulando bou matanan na Aruba, debi na un falta di consentisacion nacional riba e importancia pa mantene nos medio ambiente saludable.

Y ta p'esei mes, e ehecutivo di AHATA ta hopi contento pa e iniciativanan di entre otro Byron Boekhoudt y Atrid Muller pa organisa e di dos Conferencia Nacional di Coastal Zone Management.

“AHATA ta orguyoso di ta forma parti di e evento aki, y mi ta impresiona pa e trabou cu a keda haci pa realisa e evento aki.” Pesquera ta referi en particular na e expertonan kendenan ta participando na e conferencia, cu nan lectura y conocimiento. “Pero e reto mas grandi ta pa sali di un conferencia, y bin cu accion. Di plan, pa realidad.”

Jorge Pesquera a bisa cu ultimo



tempo e a dicidi di cana di su cas na Bubali pa su trabou, y den e caminanan aki, e por a observa e camindanan y locual ta bou y rond di mata. “E realidad ta cu e isla bunita aki a keda inunda pa botternan di Heineken, Balashi, Polar, y

plastic na cantidad. Saco di plastic ta pega tur caminda, y resto di construccion ta acumula tur caminda, y animalnan canando los riba caya. Nos a hasta mira hende tira botter for di nan auto, y pio ainda, for di nan boto.”

FACTORNAN

Y tur esaki ta un bista cu

ta afecta Jorge Pesquera como un ehecutivo turistico cu apenas tin algun aña na Aruba. Un bista cu ta afecta hopi hende cu ta bishita nos isla, y cu por dicidi cu Aruba ta mucho sushi y descuida pa ta un destinacion turistico. Y e balor economico aki ta locual Coastal Zone Management kier cuida tambe, banda di e medio ambiente mes. E dos factornan aki ta mara na otro.

“Na Minister di Medio Ambiente, na miembro di Parlamento, den e camber aki tin e solucion,” Pesquera a urgi na Minister Booshi Wever y Vice Presidente di Parlamento Zulay van Poppel, refiriendo na e exhibicion cu a organisa na ocasion di e conferencia di Maneho di Zonal Costal. Un exhibicion cu ta ilustra tur e puntonan problematico cu ta afecta medio ambiente di Aruba, y e posibilidadnan cu tin pa nan solucion (red. Lamentablemente, Minister Wever no por a tuma tempo pa bishita e diferente exposicionnan, entre otro di Stimaruba, Tortugaruba, Parke Nacional Arikok y otro, pa motibo di otro compromiso). “Tin hopi trabou y sacrificio

cu a keda hinca, pa realisa e conferencia aki,” Jorge Pesquera a bisa. “AHATA y ATSA, cu ta e asociacion di Time Share, a duna un contribucion substancial pa organisa e evento aki, y mi ta kere ta pasobra ambos organisacion ta comprometi pa haci e medio ambiente di Aruba y e zona costal di e isla, esun miho posible.”

MESTER DI LIDER

AWOR

E CEO di AHATA a enfatisa cu awor ta momento cu mester di lidernan, vision y financiamiento for di Gobierno. “Sector priva lo ta para cla pa yuda, pa hunto pinta un vision pa futuro. Un isla pristino, tanto riba tera como den lama. Un lider den Maneho di Zona Costal y di consentisacion medio ambiental tanto den Caribe, den e continente Mericano como globalmente,” ta e deseo di Jorge Pesquera.